

Samþykkt um hundahald í Reykjavík.

Stjórnssýsla. Kæruheimild.

1. gr.

Umhverfis og heilbrigðisnefnd Reykjavíkur fer með málefni hunda og hundahalds í lögsagnarumdæmi Reykjavíkur og annast Heilbrigðiseftirlit Reykjavíkur þau mál í umboði hennar.

Öllum ákvörðunum sem Heilbrigðiseftirlitið tekur á grundvelli samþykktar þessarar má skjóta til Umhverfis- og heilbrigðisnefndar úrskurðar. Málskotsrétt eiga þeir sem hafa lögvarða hagsmuna að gæta vegna þeirrar ákvörðunar og aðgerða sem um ræðir.

Bann við hundahaldi. Undanþágu.

2. gr.

Hundahald er bannað í Reykjavík nema að fenginni undanþágu að uppfylltum þeim skilyrðum, sem sett eru í samþykkt þessari.

Skilyrði fyrir undanþágu

3. gr.

Undanþágu til hundahalds má samkvæmt umsókn veita að uppfylltum eftirfarandi skilyrðum:

- a. Umsækjandi skal vera lögráða og er leyfið persónubundið og óframseljanlegt og bundið við heimili umsækjanda enda er það ófrávíkjanlegt skilyrði að hundur sé skráður þar og haldinn.
- b. Við mat umsóknar getur Heilbrigðiseftirlitið leitað umsagnar lögreglu og annarra heilbrigðisyfirvalda um umsækjanda og þá hagi hans sem þýðingu geta haft.
- c. Hafi umsækjandi ítrekað eða gróflega gerst brotlegur við samþykkt þessa eða fyrri samþykktir sama efnis eða lög um dýravernd, er heimilt að hafna umsókn hans.
- d. Umsókn skal fylgja staðfesting um að umsækjandi hafi sótt viðurkennt (af HR) námskeið um hundahald eða meðmæli tveggja valinkunnra manna um hæfi hans til að halda hund.
- e. Að fyrir liggi samþykki sameigenda þar sem það á við, sbr. 6. gr.
- f. Að keypt sé ábyrgðartrygging vegna hundsins, sbr. 9. gr.
- g. Að hundurinn sé örmerktur, sbr. 10. gr.

Bannaðar hundategundir. 4. gr.

Óheimilt er að halda hunda af eftirtöldum tegundum:

- a. Pit Bull Terrier
- b. Fila Brasileiro
- c. Toso Inu
- d. Dogo Argentino
- e. Blendinga af ofangreindum tegundum
- f. Blendinga af úlfum og hundum
- g. Aðrar tegundir sem hættulegar eða óæskilegar eru að fenginni reynslu eða mati sérfróðra aðila.

Hundar á lögbýlum. 5. gr

Hunda á lögbýlum skal skrá og skulu eigendur þeirra greiða skráningargjald fyrir hvern hund en þeir eru undanþegnir árlegu eftirlitsgjaldi fyrir tvo hunda. Hundar á lögbýlum mega eingöngu vera lausir á landi þeirra. Að öðru leyti gilda önnur ákvæði samþykktarinnar um hunda á lögbýlum.

Hundar í fjöleignarhúsum, raðhúsum o.fl. 6. gr

Þegar sótt er um undanþágu til að halda hund í fjöleignarhúsi þar sem **inngangur er sameiginlegur**, skal umsókn fylgja skriflegt **samþykki** þeirra sameigenda, sem hlut eiga að máli.

Þegar íbúð umsækjanda hefur **sérinngang**, þótt um sé að ræða annars konar sameiginlegt húsympi eða sameiginlega lóð, þá er veiting undanþágu til hundahalds **ekki** háð samþykki annarra eigenda enda er öll viðvera og /eða umferð hundsins um slík rými stranglega bönnuð. Brot á því telst alvarlegt brot á samþykkt þessari og skilyrðum undanþágunnar og varðar sviptingu hennar.

Ef annað er ekki tekið fram, nær samþykki skv. 1. og 2 mgr. einvörðungu til eins **ákveðins hunds** og gildir á meðan hann **lifir**. Heimilt er að **afturkalla** samþykki ef forsendur breytast verulega. Ástæður, sem réttlætt geta afturköllun eru m.a. heilbrigðisástæður, svo sem ofnæmi, og óþægindi og ónæði, sem fer verulega fram yfir það, sem venjulegt og eðlilegt er.

Ef um er að ræða **annars konar sameign** en getur í 1. mgr., eða nábyli af öðrum toga og sameigandi eða nágranni telur hundahaldið fara í bága við rétt sinn og hagsmuni, s.s. vegna ofnæmis eða ítrekaðs eða verulegs ónæðis og færi hann fram gild rök og fullnægjandi gögn því til stuðnings, getur Heilbrigðiseftirlitið synjað um umbeðið leyfi eða afturkallað áður veitt leyfi..

Ef íbúð í fjöleignarhúsi er leigð út skal leigusali **upplýsa leigjanda** hvort hundahald er leyft í húsinu.

Fyrirfram samþykki, leyfi, utanborgarhundar, skammtímaheimsóknir.

7. gr.

Áður en hundur/hvolpur er tekinn inn á heimili í fjöleignahúsi skal afla samþykkis samkvæmt 6. gr. Óheimilt er að láta hund dvelja lengur en einn mánuð á heimili án þess að sótt sé um leyfi fyrir honum.

Hundar, sem ekki eru skráðir í Reykjavík mega ekki dveljast þar nema með leyfi Heilbrigðiseftirlitsins og að fengnu samþykki samkvæmt 6. gr.

.Um skammtímaheimsóknir hunda í hús gildir ákvörðun eigenda einbýlis- og fjöleignahúsa hverju sinni og/eða reglur viðkomandi húsfélags.

Umsóknir, skráning og frestir

8. gr.

Umsókn um undanþágu til hundahalds skal senda Heilbrigðiseftirliti Reykjavíkur innan mánaðar frá því að hundur/hvolpur er tekinn inn á heimili, enda hafi leyfis skv. 6. gr. verið aflað. Umsókn skal fylgja greiðsla skráningargjalds sbr, 12, gr, Heimilt er að halda hvolpa, sem vistaðir eru á skráningarstað móður, án skráningar þar til þeir verða 4 mánaða.

Hundaskrá, tilkynningarskylda eiganda.

9. gr.

Upplýsingar um hundinn skal skrá hjá Heilbrigðiseftirlitinu. Skrá skal heiti, aldur, kyn, tegund, litarhátt, númer örmerkis og önnur einkenni hundsins. Þar skal einnig skrá nafn og heimilisfang leyfishafa. Leyfishafi fær afhenta merkta plötu, sbr. 11.gr. og eintak af samþykkt um hundahald í Reykjavík.

Hundaeiganda ber að tilkynna Heilbrigðiseftirliti Reykjavíkur um aðsetursskipti. Einnig skal hann tilkynna eftirlitinu ef hundurinn deyr eða er fluttur úr lögsagnarumdæminu, og hvert hann flytur. Eigendaskipti skal tilkynna með sama hætti.

Ábyrgðartrygging.

10. gr.

Leyfishafa er skylt að hafa í gildi ábyrgðartryggingu vegna hundsins og gerir Heilbrigðisnefnd heildarsamning við tryggingarfélag eða félag um slíka tryggingu. Iðgjald skal innifalið í skráningargjaldi og árlegu eftirlitsgjaldi sbr. 12. gr.

Skal ábyrgðartryggingin ná til alls þess tjóns, sem hundurinn kann að valda mönnum, dýrum, gróðri og munum. .

Ormahreinsun, örmerking, merkiplata.

11. gr.

Skylt er að ormahreinsa hunda á hverju ári.. Vottorði dýralækna um ormahreinsun skal skilað til eftirlitsaðila fyrir 31. desember ár hvert.

Hundur sem sótt er um undanþágu fyrir skal örmerktur af dýralækni samkvæmt stöðlum Alþjóðastaðalskrárráðsins (ISO 11784 eða 11785).

Einnig skal hundurinn ávallt bera ól með plötu um hálsinn. Á plötuna skal greypa skráningarnúmer hundsins og símanúmer eiganda hans. Þá skal við ólina festa merki, sem sýni að árlegt eftirlitsgjald hafi verið greitt.

Gjöld fyrir undanþágu.

12. gr.

Fyrir undanþágu til að halda hund skal undanþáguhafi greiða gjöld sem renna í borgarsjóð, annars vegar leyfisgjald og hins vegar eftirlitsgjald. Gjöldum þessum er ætlað að standa undir kostnaði borgarinnar af hundahaldinu og framkvæmd samþykktar þessarar. Borgarstjórn ákveður árlega gjöldin með gjaldskrá, sem umhverfisráðherra staðfestir.

Leyfisgjaldið greiðist við skráningu hunds og eftirlitsgjald síðan árlega 1. mars með eindaga 1. apríl ár hvert. Dragist greiðsla lengur en mánuð fram yfir eindaga fellur undanþágan niður.

Heimilt er að veita þeim hundaeigendum, sem sótt hafa námskeið viðurkennt af Heilbrigðiseftirlitinu um meðferð hunda allt að helmingi (50%) afslátt af árlegu eftirlitsgjaldi, enda hafi leyfishafi ekki gerst brotlegur við samþykkt þessa.

Helstu varúðar-, aðgæslu og -umgengniskyldur hundeigenda

13. gr.

Leyfishafi skal gæta þess vel, að hundur hans valdi ekki hættu, óþægindum eða óþrifnaði, né raski ró manna.

Hundaeigendum er ávallt skylt að fjarlægja saur eftir hundinn.

Óheimilt er að láta hunda vera lausa innan marka þéttbýlis, nema nytjahunda, þegar þeir eru að störfum í gæslu eiganda eða umráðamanns.

Hundar skulu annars ávallt vera í taumi utan húss, sbr. þó 14. gr., og í umsjá manns, sem hefur fullt vald yfir þeim. Heimilt er þó að hafa hunda lausa undir eftirliti ábyrgs aðila innan hundheldra girðingar.

Óheimilt er að tjóðra hund án eftirlits ábyrgs aðila. Þegar hundur er tjóðraður á lóð, skal taumurinn ekki vera lengri en svo að að komast megi óhindrað að aðaldyrum húss.

Bannað er að árásarþjálfa hunda, nema í löggæsluskyni.

Taumskylda og sérstakar takmarkanir.

14. gr.

Heimilt er að vera með hunda í taumi á göngustígum borgarinnar, í almenningsgörðum, í Heiðmörk, nema á brunnsvæðum og á varptíma fugla, og á hesthúsasvæðum í Víðidal og á Víðivöllum í taumi og fylgd ábyrgs aðila.

Óheimilt er að fara með hunda á almennar samkomur.

Óheimilt er að fara með hunda um Bankastræti, Laugaveg að Rauðarárstíg, Lækjartorg, Austurstræti, Aðalstræti og Ingólfstorg.

Enn fremur er óheimilt að fara með hunda á eftirtalin útivistarsvæði: Öskjuhlíð, Heiðmörk um varptíma fugla, (1. maí til 15. ágúst), Viðey, hólmana í Elliðaárdal, bakka Elliðaánna um laxveiðitíma og í Nauthólsvík.

**Staðir þar sem hundar mega vera lausir.
15. gr.**

Heimilt er að sleppa hundum lausum á eftirtöldum stöðum og svæðum:

1. Geirsnef.
2. Geldinganes.
3. Innan hundaheldra girðinga og hundaæfingasvæða, sem samþykkt hafa verið af Umhverfis- og heilbrigðisnefnd.
4. Auð svæði, fjarri íbúðabyggð.

**Óheimilir staðir skv. ýmsum reglugerðum.
16. gr.**

Ekki má hleypa hundum inn í almenningsfarartæki, leikvelli, íþróttavelli eða þá staði, sem um getur í 4. og 8. kafla og 11. – 16. kafla heilbrigðisreglugerðar nr. 149/1990 með síðari breytingum eða þangað sem matvæli eru meðhöndluð, sbr. reglugerð um matvæli, né inn í húsnaði vatnsveitna, sbr. reglugerð um neyslu- og ölkelduvatn.

Nánar er hér m.a. um að ræða:

1. Vatnsveitur, vatnsból og vatnsverndarsvæði þeirra, brunnar og sjóveitur
2. Almennings- og útisalerni
3. Hvers konar sorpgeymslu- og sorpförgunarstaðir
4. Gististaðir, veitingastaðir og matsölustaðir
5. Tjald- og hjólhýsasvæði, nema með leyfi umsjónaraðila
6. Húsakynni þar sem geymd eru, framleidd eða seld matvæli
7. Skólar, kennslustaðir, barnaheimili og gæsluvellir
8. Rakarastofur, hárgreiðslustofur, hvers konar snyrtistofur og sólbaðsstofur
9. Heilbrigðisstofnanir, hæli, heilsuræktar- og íþróttastöðvar og baðstofur
10. Fangelsi og aðrar vistarverur handtekinna manna
11. Samkomuhús hvers konar og staðir, sem almenningur hefur aðgang að vegna afgreiðslu og þjónustu
12. Kirkjugarðar
13. Almenn samgöngutæki, nema leigubifreiðar með samþykki bílstjóra.

**Frávik og undanþágur.
17. gr.**

Víkja má frá fyrirmælum samþykktar þessarar sem banna eða takmarka umferð og dvöl hunda um tiltekna staði þegar um er að ræða hunda, sem notaðir eru til löggæslu eða björgunarstarfa eða sem leiðsöguhundar sjónskertra.

Heilbrigðiseftirlitið getur einnig veitt undanþágu frá framangreindum ákvæðum í sérstökum tilvikum.

**Lausir hundar, handsömun, geymsla, aflífun, kostnaður.
18. gr.**

Sleppi hundur frá eiganda eða umráðamanni, skal viðkomandi tafarlaust gera ráðstafanir til að handsama hann. Hunda í lausagöngu skal færa í sérstaka hundageymslu og tilkynna eiganda, sé hundur merktur, handsömunina svo fljótt sem auðið er. Eigandi hunds skal greiða allan kostnað við handsömun og geymslu hans, áður en hann er afhentur á ný. Ef hunds er ekki vitjað innan einnar viku frá handsömun, er heimilt að ráðstafa honum til nýs eiganda eða selja hann fyrir áföllnum kostnaði. Að öðrum kosti skal hann aflífaður.

Hafi hundur verið handsamaður, er óheimilt að afhenda hann fyrr en að lokinni skráningu, greiðslu leyfisgjalds og áfallins kostnaðar. Kostnaður við handsömun, geymslu eða aflífun hunds skal að fullu greiddur af eiganda.

**Grimmir, varasamir og hættulegir hundar. Aflífun.
19. gr.**

Hafi eigandi hunds eða eftirlitsaðili ástæðu til að ætla að hundurinn sé grimmur eða varasamur, skal eigandi sjá til þess að hundurinn sé ávallt mýldur utan heimilis síns.

Ef hundur telst hættulegur, getur eftirlitsaðili, tjónþoli eða forráðamaður hans krafist þess að hundurinn verði aflífaður og er þá skylt að verða við þeirri kröfu, enda hafi verið leitað álits sérfróðra aðila, s.s. dýralæknis eða hundapjálfa, sem viðurkenndur er af Heilbrigðiseftirlitinu, áður en ákvörðun um aflífun er tekin.

**Svipting undanþágu vegna brota.
20. gr.**

Ef hundaeigandi brýtur gegn lögum um dýravernd, dýrahald, samþykkt þessari eða öðrum reglum, sem um dýrahald gilda, getur Heilbrigðiseftirlitið afturkallað leyfi til hans og/eða bannað honum að vera með hund í lögsagnarumdæmi Reykjavíkur.

**Lögregluaðstoð. Nánari reglur.
21. gr.**

Heilbrigðiseftirlitið getur ef þörf krefur leitað atbeina lögreglu við að framfylgja samþykkt þessari og ákvörðunum teknum á grundvelli hennar.

Umhverfis- og heilbrigðisnefnd getur sett nánari reglur um framkvæmd samþykktar þessarar

**Refsiviðurlög.
22. gr.**

Brot gegn samþykkt þessari varða sektum eða varðhaldi. Með brot á samþykktinni fer að hætti laga um meðferð opinberra mála og einnig eftir ákvæðum VI. og VII. kafla laga nr. 7/1998 um hollustuhætti og mengunarvarnir.

Áðurveittar undanþágur.**23. gr.**

Þær undanþágur til hundahalds, sem veittar hafa verið fyrir gildistöku samþykktar þessarar, halda gildi sínu. Að öðru leyti gildir samþykktin um áðurveittar undanþágur.

Lagagrundvöllur.**24. gr.**

Samþykkt þessi staðfestist hér með skv. 25. gr. laga nr. 7/1998 um hollustuhætti og mengunarvarnir og öðlast gildi þegar við birtingu og fellur þá úr gildi samþykkt um hundahald í Reykjavík nr. 388, 25. maí 1999.

Reykjavík 17. janúar 2002

F. h. r.

Ingimar Sigurðsson

Sigurbjörg Sæmundsdóttir